

ASOMA a haña permiso pa organizá Calypso y Tumba Contest e aña aki

Cambio den Carnaval 40

ORANJESTAD - Carnaval 40 a start sali, pero for di aña pasá por a sinti cu lo bin un particion entre e asociacion di músiconan y SAC.

Un particion cu kizas e organizacion di Carnaval SAC nunca por a biba pensa. Pero debí na nan actuacion terco lo bai perde dos di e eventonan mas pisá cu ta Tumba contest y Calypso Contest.

E actividadnan aki lo tuma lugá e luna aki caba cu ta 15 y 22 di Januari.

ASOMA a yega asina leu cu Ministro di Husticia Rudy Croes a otorgá nan e permiso pa organizá e máximo eventonan aki completamente separá for di SAC.

Den un entrevista cu Presidente di ASOMA Sr. John Jeandor el a bisa for di dia 30 di November nan a dirigi un carta pa Ministro di Husticia Croes, solicitando permiso pa por organizá e

festival di Tumba y Calypso.

ASOMA di su banda a keda masha contento y gradecido ora cu nan a tende cu Ministro a bai di acuerdo y otrogá nan e permisonan.

Segun Jeandor mirando cu e festivalnan ta algo público y cu ta tuma lugá na un lugá público mester tin permiso necesario pa parti di polis.

E disgusto cu ASOMA a haña cu SAC ta debí na un carta cu nan a haña na luna di Augustus for di SAC. Den e carta aki na un forma no mucho elegante SAC ta manda bisa nan cu nan lo tuma tur cos over y cu ASOMA lo no tin partícipe den nada.

Y den e forma intransigente cu ASOMA ta considerá e carta, e directiva den un reunion a bai di acuerdo pa organizá e actividadnan di tanto Tumba como Calypso.

Pa loke ta organizacion di e festivalnan aki ta algo cu ta biba pa basta aña caba cerca ASOMA. Y mirando kico a pasa aña pasá cu ASOMA, e mal experiencia y trato cu a

haña for di SAC, ta yega e momento pa mostra cu nan tambe por organizá e festivalnan di Tumba y Calypso.

Riba e yamada di e músiconan directiva di ASOMA a decidí pa organizá e dos festivalnan aki.

E hecho aki sigur ta bai trece cuné cu SAC ta bai perde un entrada substancial pa cubri su gastonan.

SAC nunca a presentá kico ta nan gastó y entradanan real y tur ora bai por tende cu nan tin debe pero nunca SAC ta mostra e realidad unda e debenan ta.

Segun John Jeandor e músiconan tampoco no mester keda esnan cu mester hala e garoshi pa otronan disfrutá. Pasobra no por bisa cu e eleccionnan di reina tanto hubenil, infantil y grandi ta trece entradanan hopi grandi pa SAC aden.

ASOMA den pasado a yega na un acuerdo pa organizá contest di Tumba, Calypso y Roadmarch "fifty fifty" cu SAC, pero mirando relatonan

cu a bin dilanti e mal hecho nan cu tabata tumando lugá ta haci cu no por deal mas cu personanan asina.

ASOMA ta un organizacion hoben pero ta traha serio y mester traha na interes di e músiconan pasobra e músiconan tin tur derecho di mira pa tur locual nan ta producí y haci wordo recompensá pe.

E festivalnan ya tin fecha caba cu ta dia 15 di Januari

pa hende grandi y 16 di Januari calypso pa mucha.

Dia 22 e siman siguiente ta bai tin Tumba pa hende grandi y su mañan dia 23 Tumba di mucha.

E aña aki tin un anochi so di actividad debí cu Carnava ta riba man no a pone "pre final". Pa festival di Calypso esaki ta na San Nicola Sportpark y Tumba lo ta den Entertainment Center. □